





皇明異姓諸侯傳下卷目錄

譚淵

顧成

陳懋

張信

郭亮

王通

陳珪

徐祥

李濟

趙彝

張興

陳志

柳升

朱榮

高士文

梁銘

吳允誠

吳成

費瓛

蔣貴

方瑛

毛勝

楊信

朱謙

孫鏜

衛穎

陳友


曹義

施聚

焦禮

劉聚

毛忠



趙輔 仇鉞 丘福以下國 李遠

王忠 王聰 何福 郭義

王友 陳賢 房勝 陳旭

劉才 房寬 張武 徐理

孟善 唐雲 茹瑞 王佐

王寧 袁容 李讓 火真

金忠 金玉 薛斌 薛貴

李賢 吳管者 勝定 金順

李英 蔣信 羅秉忠 和勇

李玉 蔣廷珪 趙安 任禮

沈清 譚廣 陳懷 馬亮

楊能 石亨 楊善 張輓弟軌

董興 李文 趙勝 李震

神英

恩澤侯目錄

張昶 張昇 孫忠 吳安

錢承宗 周壽 王源 張巒

邵喜 蔣輪 夏儒 陳萬言

方銳 崔元 陶仲文

皇明異姓諸侯傳卷下

吾學編第十九

海鹽鄭曉

譚淵

譚淵清流人父勝開國功爲燕山副千戶淵嗣官
從靖難奪九門永平大寧真定藁城滄州功陞都
指揮同知建文三年三月夾河戰歿子忠嗣官從
靖難有功建文四年贈淵崇安侯謚壯節立祠香
山陽京尹春秋少牢祭忠以淵故得封新寧伯食
祿千石與世券宣德二年征交趾失律下獄赦出
八年卒子璟乞嗣伯吏部言忠失律論死子不得

嗣 上曰卷不免死文與璟嗣正統十三年卒子裕嗣景泰三年卒庶子祐年九歲優給天順元年嗣祐恭慎守法好禮爲京營總兵最久累加大保太傅嘉靖五年卒謚莊僖子綸嗣

顧成

顧成字景昭其先湘潭人成往來江淮間遂居江都容貌魁梧壯勇質直有膽略喜習武事自文其身誇異人或謂成黥徒者非也丙申來歸支帳前親兵常擊蓋侍 上出入忠謹無過初授百戶從征陞金吾副千戶宿衛陞指揮僉事從平蜀破貴

州蠻克普定功陞指揮使普定衛進都指揮同知已而征雲南成扼普定斷後進督府僉事克征南將軍鎮貴州征五開六洞破一百三十七寨斬首三千建文初令錦衣指揮談全諭成班師二年進同知三年進右都督是年閏三月從盛庸至真定戰敗被執 成祖解成縛曰吾且用汝遣至北平侍 仁宗居守有功建文四年以左都督封鎮遠侯食祿一千五百石與世券又出鎮貴州申嚴號令威信並行討撫諸蠻搗臺羅寨斬叛酋普亮滅其家羣蠻震懾卒年八十五贈夏國公謚武毅蠻

中皆祠祀成八子長統爲普定指揮使先卒孫興祖永樂十二年嗣侯贈父統侯爲總兵宣德中坐交趾事徵下獄正統十四年從征失律降都督同知景帝初守備紫荆關詔與伯爵英宗復辟詔復侯出鎮貴州有戰功加祿三百石守南京宣德中鎮廣西坐貪財好色失地喪師逮下獄旣而釋之子翰先卒翰子淳天順八年嗣侯卒無子淳從弟溥者成諸元孫也成化九年嗣侯溥初學國學解文墨嘗總兵團營爲平蠻將軍鎮湖廣擒貴苗僞王通滇蜀道還流移五千家復爛土長官司

設都勻府增祿二百石溥清慎囊無餘貲英國公張懋爲率布帛供歛事謚襄恪子仕隆弘治十七年嗣侯仕隆好文諳武爲京營總兵寬弘簡質得士心克漕運總兵鎮守淮安廉幹不苛擾卒贈太傅謚榮靖子寰嘉靖七年嗣侯出爲漕運總兵二十三年言官劾罷伏羌伯毛漢代寰旨下數日又劾罷漢用都督劉璽璽致仕居南京萬表代璽寰端靖廉明溫榮孝友時論歸之言官竟被考察去寰復爲漕運總兵鎮守淮安尋總督京營戎政

陳懋

陳懋壽州人父亨居和州開國功陞大寧都指揮使征虜功陞都督僉事建文初爲大寧行軍都督從靖難戰壩上先登建文二年十月戰鏢山爲平安所殺贈涇國公謚襄敏懋結髮從父兵爲前行廣昌濟南單橋西水寨東平力戰有功累官都督尋以父功封寧陽伯食祿千石與世券出鎮寧夏永樂七年捕虜赤保連卽軍中進侯立號加祿三百石三從 上北征女入宮冊麗妃特與歸寧二十一年總陝西三鎮兵征胡直擣賀蘭山盡收也先土干部落及馬駝數萬明年又從北征還後殿

仁宗加太保與世侯券 宣宗初從討漢庶人宣德二年復鎮寧夏明年徙靈州城六年還朝十年移鎮 西正統元年劾罷削祿五年奉朝請十三年充總兵討鄧茂七有功班師領宗人府景泰中加太子太師天順元年加祿二百石七年卒贈濟國公謚武靖懋偉貌修髯洪聲禮敬文士長子晟勲衛坐罪謫戍晟弟濶嗣侯成化二年卒無子弟瑛嗣侯晟爭瑛不宜嗣革瑛祿十五八年晟子輔生二年矣晟言臣罪廢臣男宜優給瑛本借臣爵宜還臣男內批候輔壯二十二年輔嗣侯與瑛爲

異如言傳 卷一 四 三百五十八
勳衛弘治元年輔坐殺人會赦革爵編氓八年瑛
子恩之子繼祖繼祖懋曾孫也年七歲與米月十
石正德元年嗣侯

徐忠

徐忠字仲達合肥人父用開國功陞副千戶忠嗣
官征虜功陞濟陽衛指揮僉事鎮開平靖難時歸
附立功燕趙齊楚間白溝之戰敵揮刃斫忠兩指
未殊忠自斷指擲地裂衣帛裹創發憤進戰大捷
歷陞都指揮僉事建文四年封永康侯食祿千一
百石與世券 仁宗監國留忠南京掌兵政卒贈

蔡國公謚忠烈忠三庶子安敬曦爭襲永樂十六
年 上令長庶子安嗣侯卒子昌先卒昌子錡嗣
侯卒子溥乞優給旨下戶部戶部以非職掌移吏
部吏部爲溥請月給米十石卒庶長子源嗣與優
給長嗣侯

張信

張信臨淮人父興開國功爲永寧指揮僉事信嗣
官紫江草塘功陞都指揮僉事洪武三十一年建
文君卽位疑北平大臣薦信有謀勇名調北平都
司受密勅令與謝貴張昺合力盡縛藩府人信日

夕憂憐母怪而問之信詭對曰兒統兵邊關焉能無憂母曰汝非此憂其語我故信屏左右對曰密旨欲得親王奈何母大驚曰不可汝父每言王氣在燕汝無妄爲禍家族信益憂懼未幾勅促信益急信艱然起曰何忍已甚至此三造燕邸 文皇辭不見乃乘婦人輿求見 文皇召入拜 文皇床下時 文皇稱風病不能言久矣信頓首曰殿下無恙卽有恙當急諭臣 文皇曰余誠病且困待死爾信復曰殿下不以情語臣朝廷密勅信執殿下殿下意果無他幸從臣歸命京師卽有意宜

告臣 文皇見信稱臣又意甚誠惻泣下告信密謀立召姚廣孝朱能張玉定計奪九門信遂從靖難兵戰大寧真定鄭村壩還軍攻九門營西克大同轉戰夾河藁城渡淮破盛庸兵入金川門陞都督僉事建文四年封隆平侯食祿一千石與券世伯 文皇時時呼信爲恩張凡召太子北京察藩王動靜諸密要事皆命信永樂二十年征胡功加少師洪熙元年與世侯券支兩俸子鏞自立功爲指揮僉事先卒鏞子淳嗣官正統七年信卒贈鄖國公謚襄僖淳以指揮僉事嗣侯卒子福嗣侯無

子弟祐嗣侯卒無子弟祿與禱爭嗣下法司理正
德三年祿嗣侯卒子偉優給十二年嗣侯

郭亮

郭亮合肥人父聚開國功陞流百戶亮嗣官征胡
功歷陞永平指揮從靖難與都督耿璈戰又與都
督楊文戰皆有功當是時靖難兵南下亮獨守永
平與北平爲聲援建文四年封成安流侯世伯食
祿千二百石出守開平築烽堠永樂二十一年卒
贈興國公謚忠壯庶長子晟嗣侯宣德五年扈蹕
先入德勝門歸私第劾下錦衣獄天順二年卒無

子弟鼎乞嗣 上曰如誥券與伯爵卒子鑽嗣伯
卒子寧嗣伯卒寧子璋早卒璋從弟瓚嗣伯

王通

王通陝咸寧人父真開國功爲燕山護衛百戶從
靖難攻九門戰永平真定功陞都指揮使建文四
年淝河戰歿 文皇卽位贈金鄉侯謚忠壯進贈
寧國公通亦從靖難有功又以父故封武義伯食
祿千二百石與世券永樂七年作天壽山十三年
進封成山侯二十三年與世券又以父故加祿歲
一千石 仁宗時以真從祀 文皇宣德元年克

征夷將軍總兵鎮交趾未幾通言交趾反勅通勦賊都督方政坐罪隸麾下立功二年斬僞司徒利賊大懼通怯不敢追又爲庵山壽所窘賊復聚寧橋戰通敗績柳升兵又未至通輒與利賊書和許畀清化等州地按察使楊時習以爲不可力爭通勵聲叱時習比升兵至隘留關又大敗升死通遂與利賊盟班師陸行出廣西山壽陳智由水道出欽州凡文武吏士得還者八萬六千六百四十人利賊閉留不遣者尚數萬人三年廷臣劾通論當死繫獄奪券籍其家會赦宥死爲民正統元年通

子琮乞得祖塋葬通母十四年北虜南侵廷薦通爲都督僉事與楊善守京城禦虜功陞都督同知尋守山陵景泰三年卒琮爲景陵指揮僉事天順元年詔恩琮得嗣成山伯卒子鏞嗣伯弘治十一年乞券 孝宗念真靖難功又侑食 太廟出原券賜鏞卒子洪嗣吏部言通罪廢琮嗣伯以詔恩鏞時未許世嗣執不許洪嗣伯 上以洪祖真券故在許洪嗣伯

李彬

李彬定遠人或曰和州人父信權指揮僉事彬善

騎射嗣父官爲真從傳將軍征朵顏經略宣府興和雲州築萬全懷來城從靖難率騎兵攻薊州轉戰雄漠真定襲大寧鏖鄭村白溝濟南滄州掠彰德皆有功歷陞督府僉事建文四年護仁孝皇后至京明年封豐城侯食祿千石與世券出鎮西陲六年以交趾功加祿五百石永樂二十年卒贈茂國公謚剛毅明年子賢嗣侯鎮守大同守備南京景泰二年卒贈豐國公謚忠憲四年子勇嗣侯卒無子第昇之子熙嗣

陳珪

陳珪泰州人開國功陞百戶調燕山護衛擒虜乃兒不花陞副千戶靖難奪九門雄鄭功陞指揮又壩上力戰陞都指揮大戰楊村陞僉事督府建文四年封太寧侯食祿一千二百石與世券卒贈靖國公謚忠襄子璽先以靖難功爲武成左衛指揮使璽子鍾已嗣指揮使珪次子愉遂得嗣侯二十年北征失律下錦衣獄死鍾與愉子鏞爭嗣仁宗以鍾庶長孫二十二年嗣侯卒子灝宣德五年嗣卒無子八年弟瀛乞嗣宣宗曰陳愉失律念璽有功璽孫瀛與嗣侯給半祿十年吏部言璽年

十五與全祿已已陣歿是年弟涇嗣侯成化元年失律坐斬赦還侯停祿卒子桓八年嗣侯十二年桓坐與僧娼飲酒淫酗奪俸一年子璇弘治七年嗣侯卒子儒正德七年嗣侯卒

徐祥

徐祥大冶人漢萬戶歸附從軍功陞燕山護衛千戶靖難兵起攻奪九門轉戰漁陽真定永平彰德白溝河滄州保定小河齊眉山渡淮江入金川門有功建文四年九月封伯十三人祥第一爲興安伯食祿千石與世券祥在靖難諸將中年稍長及

封益勤慎不敢驕怠永樂二年卒子永未嗣伯卒永子亨嗣伯正統元年征胡功進流侯加祿百石卒謚武襄子賢嗣伯病跛與半祿免朝請卒子盛優給十六年嗣伯卒無子從子良正德三年嗣伯卒子勲嗣伯卒子夢暘優給嘉靖二十年嗣伯

李濟

李濟和州人父旺開國功爲燕山獲衛千戶濟嗣官從靖難執謝貴張昺奪九門克居庸轉戰永平真定功陞指揮僉事鄭村壩大捷陞都指揮僉事白溝濟南功陞同知建文四年封襄城伯食祿一

千石與世券永樂元年出鎮江西召還三年卒子
隆年十五嗣伯八年從 上北征有功十四年留
守南京 仁宗時出鎮山海未幾復守南京先後
凡十八年正統五年入總禁兵十一年巡邊明年
卒隆有才畧頗好文恭慎不敢驕守法度明年子
珍嗣伯又明年沒於土木無子弟璉病不能嗣璉
弟瑾景泰元年嗣伯成化三年總兵與程信征川
貴蠻大戰渡船舖攀崖焚其巢賊退保大壩貴人
掎之川人角之賊敗奔入洞室而圍之逾月皆死
四年進流侯弘治二年卒贈芮國公謚莊武子黼

嗣伯卒無子璉子郟嗣伯正德四年卒子全禮嗣
伯嘉靖十八年卒明年子應臣嗣伯

孫巖

孫巖鳳陽人開國功爲流百戶改護衛十三年從
藩王之燕山久之致仕子亨嗣官陞正千戶建文
元年巖以致仕官從靖難守通州突門力戰追奔
至張家灣掠餉舟三百復還守城又敗遼東兵歷
陞都指揮建文四年封應城伯食祿千石與世券
永樂十六年卒贈翼城侯謚威武亨先以靖難立
功薊州永平鄭村壩大同白溝河滄州彰德靈璧

入金川門歷陞河南都指揮嗣父伯卒子英嗣伯
卒無子弟傑嗣伯正統元年坐不敬勒罷卒子繼
先嗣伯卒子鉞嗣伯嘉靖十八年卒

趙彝

趙彝虹人洪武初虎賁百戶調燕山右衛從賴國
公征沙漠城宣府萬全懷來歷陞永平衛指揮僉
事靖難兵至永平彝以城降從徐忠等轉戰有功
陞北平都指揮使 文皇卽位封忻城伯食祿一
千石與世券永樂十三年鎮徐州 仁宗召還卒
子榮嗣伯卒子溥嗣伯卒姪槿嗣伯卒子武正德

十三年嗣伯

張興

張興壽州人開國功歷陞燕山護衛指揮僉事靖
難時奪九門戰漁陽永平大寧廣昌白溝河濟南
夾河西水寨功歷陞都指揮同知從子勇年壯有
膂力從興行間先登興嘗單騎追敵被十餘創病
勇領其兵嗣護衛指揮使戰淮泗渡江入金川門
陞都指揮同知 文皇卽位封興安鄉伯食祿千
石與世券五年卒贈侯七年勇嗣伯明年從征胡
失律謫交趾總旗立功十年赦還復伯道病卒十

五年子安嗣伯正統十三年出鎮廣東十四年戰賊黃蕭養敗歿子鑄優給卒無子安弟寧嗣伯卒子珣嗣伯卒子勲未嗣卒孫坤嗣伯

陳志

陳志巴人開國功累陞燕山中護衛指揮僉事從靖難戰真定白溝河濟南再陞都指揮同知永樂元年封遂安伯食祿千石與世券卒志二子長良坐法謫戍死次春立功爲指揮使先志卒春子瑛嗣僉事指揮矣至是良子瑄與瑛爭嗣伯吏部上請文皇曰瑄父洪武中獲罪無勞於國然志適

孫也春有功授指揮瑛已嗣父官今與瑛伯奈適孫何瑛又不肯讓下廷臣議議上瑄適孫宜嗣

文皇曰瑄與瑛也令陛見朕二人者見文皇曰二人者皆可嗣朕與汝鬪鬪得伯者嗣瑛得鬪

文皇笑曰乃汝瑛也竟得伯者瑛卒子墳幼與半祿優給正統十一年嗣十四年隨上北征陣沒

無子墳叔韶與瑄又爭嗣景帝曰先朝言二人者皆得嗣今國家急人總兵石亨楊洪尚書于謙

擇嗣一人必有功也與世嗣謙等上言瑄老韶壯景帝令韶嗣伯天順八年韶坐干撓軍政奪坐營

成化三年又坐事謫立功遼東明年赦還七年乞恩與半祿朝請卒孫鏞乞嗣下廷臣再議鏞始得嗣伯正德中爲薊州總兵朶顏入塞召還嘉靖中爲京營總兵

徐增壽

徐增壽武寧王第三子少隨父入見太祖太祖喜其秀朗機警賜名增壽長勇敢立戰功陞右軍都督嘗從文皇出塞征乃兒不花有功班師入見仁孝皇后還朝數與文皇往來靖難兵起建文君疑增壽繫禁中文皇兵入金川門建文

君梓增壽至左順門殺之廡下卽發火燒宮文皇卽位念增壽首贈武陽侯謚忠愍永樂二年加贈定國公子景昌嗣公食祿二千五百石與世券卒子顯忠嗣公卒子永寧優給嗣公卒子世美未嗣卒孫光祚嗣公嘉靖五年加太師八年卒子延德嗣公

柳升

柳升懷遠人父崇或名德立功洪武時爲燕山護衛百戶升嗣官事成祖靖難攻懷來密雲白溝河東平大小二十餘戰皆有功歷官都司督府永

樂四年征交趾功六年封安遠伯食祿千石與世
券八年北征至玄冥河功進流侯加祿五百石仍
世伯出鎮寧夏還總京營兵又從 上北征至蒼
崖峽鬼力河慶州有功得世侯十八年討唐賽兒
失律下吏尋宥二十年又從征胡宣德四年王通
言交人反升爲征虜副將軍充總兵保定侯梁銘
左副總兵都督崔聚左叅將率兵會沐晟討利二
年兵至隘留關利上書詭請立陳氏後升受書不
發封馳奏上賊已列柵拒我兵道升連破賊直抵
鎮夷關賊斂迹無禦我者升喜謂賊窘弛備銘及

叅贊尚書李慶又病慶力言賊詐升不聽至倒馬
坡入賊伏升中鏢死是月銘病卒明日慶又卒聚
收散卒進至昌江遇賊衆寡不敵聚死戰賊驅象
大至我兵遂亂聚被執賊欲降聚不屈死之聚懷
遠人靖難征胡累功至督府僉事升質直簡靖臨
敵勇敢敗死贈融國公謚襄愍子溥宣德十年嗣
侯鎮守廣西天順初年加太傳出守甘涼虜殺掠
人畜不能禦御史劉濟劾溥失律 上怒御史言
溥下獄落職外除比溥還 上悟欲罪溥勒溥罷
太傅溥輒乞進駝馬 上怒却其獻未幾內臣牛

玉傳旨令溥總兵神機營卒子承慶痺不能嗣孫
景天順五年嗣侯成化末鎮守兩廣弘治四年坐
法奪職下獄七年與冠服閑住景先後屢乞恩十
二年得復侯與祿三之一卒子文嗣侯卒子珣嗣
侯鎮守兩廣以撫莫登庸功加太傅

朱榮

朱榮沂人洪武初起驃騎舍人從征雲南功授百
戶出塞征胡功陞大寧副千戶 文皇至大寧榮
率衆降陞指揮僉事從還北平戰鄭村壩白溝河
藁城功三遷至都指揮使伏兵淝河大戰又戰小

河靈壁渡淮下揚州入金川門陞都督僉事征交
趾功陞右都督永樂八年從 上出塞征胡敗本
雅失里阿魯台轉左都督再從 上出塞至和林
爲先鋒破虜又從 上出塞敗虜殺胡原二十年
封武進伯食祿一千三百石與世券洪熙元年卒
贈侯謚忠靖是年子冕嗣伯正統四年出鎮大同
十四年禦虜戰歿贈侯謚忠愨是年子英嗣伯卒
子雲嗣伯卒無子第霖嗣伯卒子潔嗣伯卒子
嗣卒無子叔江嗣伯卒無子從弟海嗣伯

高士文

高士文陝西咸寧人洪武中雲南塞北功陞燕山護衛百戶從靖難戰大寧廣昌白溝夾河東平汶上每出入陷陣先登累陞都督僉事永樂四年征交趾五年交趾平餘寇奔入七源諸川山谷中出沒寇掠張將軍遣士文捕賊晝夜急攻賊突出走士文又進追賊中飛砲死部兵復追賊賊又竄入七源州以士文力戰故賊竟潰亂張將軍繼遣都指揮程錫平賊贈士文建平伯令子福嗣伯食祿千三百石與世券卒子遠嗣伯宣德五年與成安侯扈蹕不敬下獄得釋卒子震病不能嗣遠弟進

嗣伯卒無子弟逵之子儻嗣伯卒子繼宗嗣伯

梁銘

梁銘汝陽人洪武中嗣父燕山護衛百戶事 成祖靖難時南兵攻北平又攻通州銘守戰甚力積功至督府僉事侍 太子監國坐事下獄永樂十九年赦令捕倭廣東 仁宗卽位進督府同知充叅將出鎮寧夏 上念銘舊有守城功封保定伯食祿一千石與世券宣德初御史石璞劾銘守寧夏罪狀 上特原銘遣銘副柳升征交趾卒軍中銘坦夷寬簡勇敢當敵能撫循士卒銘不死崔聚

亦米至敗沒子瑤宣德十年嗣伯正統十四年坐失律謫從石亨立功尋與半祿復其爵斬虜首復與全祿景泰元年克平蠻將軍代王驥征貴州又征福建皆有功三年進流侯加祿五百石世伯天順元年與世侯卒贈蠡國公謚襄靖子傳嗣伯坐不敬逮獄習禮國子監卒子宗幼與祿歲百石優給卒次子任嗣伯卒子永福嗣伯嘉靖中爲京營總兵

吳允誠

吳允誠本胡人賜姓名永樂三年父子率衆來降

爲督府僉事出塞爲鄉導征胡至卜哈思擒哈刺乞台進同知八年扈駕敗阿魯台進都督九年又出塞逐虜至濶脫赤斬首虜中律封恭順伯食祿一千二百石先是允誠父子從 成祖出塞留家涼州虎保脅允誠部衆劫允誠妻及其少子管者叛去妻急召部將都指揮保住卜顏不花等出兵盡擒殺諸叛者 上遣行人勅勞允誠妻賜縑米羊鈔陞管者指揮僉事允誠卒贈邠國公謚忠壯子伯客十六年嗣伯賜名克忠二十二年扈駕出塞有功洪熙元年以戚里恩又有功進侯與世券

加祿二百石宣德中副總兵巡邊正統九年統兵出喜峰塞征兀良哈有功加太子太保十四年沒於土木贈邠國公謚壯勇第克勤都督亦戰歿贈遵化伯謚僖敏克忠子瑾嗣伯曹欽反劫瑾瑾不從死贈涼國公謚忠壯與世侯子鑑優給與半祿天順六年嗣侯卒子世興嗣侯

吳成

吳成本名買驢遼陽人父通伯元遼陽省右丞洪武中隨觀童來降買驢充總旗出塞征胡功陞水軍百戶從靖難攻真定大寧鄭村壩功陞指揮

僉事廣昌白溝館陶功再陞指揮使夾河藁城西水寨功陞都指揮僉事戰淝河小河齊眉山靈壁先登渡淮克揚州入金川門再陞都指揮使永樂八年從上出塞征胡功陞都督僉事已而三出塞斬獲多洪熙元年陞左都督是年大松嶺破虜封清平伯食祿千一百石與世券宣德初從擒漢庶人三年出喜峰塞敗虜寬河斬獲進封侯祿如故八年卒贈渠國公謚壯勇子忠先卒又明年孫英嗣伯卒子璽嗣伯卒無子第琮嗣伯卒子傑優給嗣伯卒子家彥優給嗣伯

費瓛

費瓛定遠人祖遇洪武中爲燕府左相已革府相改護衛指揮使父肅嗣官肅卒瓛嗣官事 成祖靖難功累官都指揮同知鎮守山海關永樂五年召僉事後府六年充副總兵備倭海上七年征湖廣叛寇八年充總兵鎮寧夏甘肅討平叛虜亦令真巴十年又出甘肅防禦 仁宗卽位充平羌將軍鎮甘肅尋陞右軍都督宣德元年入朝 上念瓛舊臣累著功名封崇信伯食祿千一百石與世券復出鎮瓛和易善撫循士卒守邊二十年塞境

寧靜征漢庶人嘗爲先鋒將佐薛祿有功子釗宣德三年嗣伯景泰中鎮守福建卒天順八年子淮溥爭嗣 憲宗曰淮母朱氏以釗故封夫人淮卽適子溥不得與淮爭成化元年與淮祿一百石優給嗣伯習學國子監十二年祭酒周洪謨言淮不務學奪半祿冠平巾以母乞恩故原淮卒子柱嗣伯

蔣貴

蔣貴江都人靖難初起小卒累戰功世昌國衛指揮同知又從征北虜九龍口大松嶺功陞都指揮

僉事充叅將擊番賊任昌深入奪橋斬關進同知
鎮守松番番夷再叛討平之陞都督僉事充副總
兵盡平諸番陞總兵平蠻將軍鎮守正統元年召
還陞右都督總兵討戎王阿台擒乃顏刺忽李羅
等三年封定西伯食祿千二百石與世券七年征
木麓川功進侯加祿三百石與世券貴奮起卒伍
能與士卒同甘苦凡出境擣賊衣糧器仗身自囊
負不役一人臨陣冒險衝敵敵皆披靡子弟士卒
追隨向敵雖目不識字短於謀略然天性朴實忘
已下人以故所向有功登上將爵通侯爲一時名

將卒贈涇國公謚武勇子義病不能嗣十四年義
子琬嗣侯成化初充平羌將軍總兵甘肅劾巡按
御史罪狀曰臺官豈盡桓典耶八年南京操江上
言六事極言江防控扼要害保護南京根本十年
召還充團營總兵上言六事二十年充平胡將軍
出雲中塞禦虜并統制宣府山西諸軍覬虜入偏
頭關斬捕有功時議徙鵬鸚堡於滴水崖琬曰獨
石八堡聲勢相首尾滴水崖遠益難救援不可徙
卒贈涼國公謚敏毅庶子驥嗣侯嘉靖三年守備
南京道卒子傳優給嗣侯

方瑛

方瑛全椒人大父銘開國功爲百戶父政靖難功爲都指揮正統三年都督總竒兵征木麓川戰歿贈威遠伯謚忠毅四年瑛以父功爲金吾指揮使憤發報父讐乞領父支兵從定西伯効死先登破賊寨進都指揮使七年從靖遠伯征賊功陞督府僉事克叅將守雲南已而從侯侍郎征貴州功進右都督克總兵移守貴州景泰元年香爐山功轉左召總五軍營論先後平賊功多封南和伯食祿千石與世券明年征銅鼓留鎮湖廣貴州天順元

年進流侯加祿三百石四年卒謚忠襄子毅嗣伯卒子壽祥嗣伯卒以嘗論大禮得贈太子太保子東嗣伯卒

毛勝

毛勝初名福壽京師人伯父邵海元舊官歸附爲燕山中護衛閑牧官從靖難歷陞都指揮同知建文四年卒無子福壽父安太邵海母弟也嗣羽林指揮使永樂七年卒福壽兄濟嗣官卒無子福壽嗣官以兄濟九龍口殺胡鎮功進都指揮使正統六年征木麓川功陞都督僉事克右叅將復征木

麓川功進同知十四年禦虜宣府功陞左府都督
是年冬守宣武門又哨虜紫荆關景泰元年充左
副總兵率河間東昌達兵征湖廣峒苗韋同烈戶
部主事陳汝言言福壽本虜人奸黠不可信勅王
驥候福壽至善御之無使驚疑已乃有功三年封
南寧伯食祿千石五年進屯金川斬賊功與世券
改名勝移金齒彈壓諸蠻天順二年卒贈侯謚忠
壯子榮嗣伯八年坐法調廣西立功卒子文嗣伯
卒子良嗣伯卒子重器嗣伯卒

楊信

楊信伯父洪信幼武悍正統初從洪征興州虜轉
戰西涼亭白塔兒斬首功累陞指揮僉事十四年
薦陞都指揮僉事守柴溝堡從洪戰虜紫荆倒馬
五郎河有功景泰二年出宣府歷陞督府僉事充
叅將再守懷來會洪病移信協守宣府五年充副
總兵天順元年召還京陞同知移鎮延綏延綏總
兵佩將軍印自信始明年虜孛來毛里孩入塞擊
退又明年虜入寧夏塞信合武平伯陳友兵於安
邊營夾擊虜遁去四年封彰武伯食祿千石與世
券五年移鎮大同成化二年毛里孩入河套出沒

塞上召信至京問方略信言兵難遙度乞精騎疾
走至榆林圖上 上從信言命爲平虜將軍總諸
鎮兵至延綏勵兵秣馬待虜烽火嚴虜奸不得入
覘我輒突入塞信縱兵邀擊小龍州鐵青原虜錯
愕盡棄掠我人畜遁渡河去明年還鎮大同六年
虜又入延綏塞信西援信曰虜覘我大同兵渡河
必乘虛東掠設伏胡柴溝虜果至伏發擊斬獲功
多八年又敗虜伯顏哈答自是虜不敢輒入塞與
世伯券十三年卒贈侯謚武毅子瑾嗣伯卒子質
優給嗣伯卒子儒嗣伯

朱謙

朱謙夏邑人父真靖難功授世留守指揮僉事謙
嗣官累征迤北功陞萬全都指揮使克右叅將分
守宣府功陞都督克鎮朔將軍總兵宣府裕陵北
狩過宣府率其子永出謁頓首哭獻犒軍勞虜金
帛屢出兵截虜有功景泰元年虜入石峰口又入
龍門關不能禦禦輒敗都督江福援謙又敗詔詰
責謙已而與虜戰斬首中律封撫寧伯卒永嗣伯
與世券天順初永陳父宣府謁 上事贈侯因稍
進用永永慎重不洩法令嚴整四年虜入宣府永

出禦虜退班師六年總兵三千營八年兼總神機營時定襄伯郭登出鎮甘肅永薦留登與同事復團營充總兵兼領三千營成化二年充靖虜將軍征荆襄有功進流侯乞謚謙武襄未幾虜亂加思蘭入大同塞充平胡將軍禦虜虜退去與世伯尋充平虜將軍出榆林禦虜有功即軍中進封侯立號總制陝西三邊與世券七年虜入屯柳樹泺永出奇邀戰有功十二年召還加太子太保十四年建州夷結朶顏入遼東塞明年永出塞破其營加太子太傅進封保國公十六年出延綏禦虜十七

年大同禦虜亦思馬因戰海東山功賜券世公十九年虜大入塞充鎮朔將軍總制宣大二路二十三年孝宗即位召還加太師掌後府總團營如故九年卒進封宣平王謚武襄子暉言與祖謙謚同改武毅是歲暉請嗣公下廷議上特令暉嗣公一世暉嘗充京營總兵與英國公懋新寧伯祐同事卒子麒請嗣公下廷議嗣侯

孫鏗

孫鏗康勝州人永樂二十年嗣父指揮同知從出塞征胡功再陞都指揮僉事正統十四年充左叅

將補處州賊功陞督府僉事戰也先都城先登有功景泰元年薦都指揮李奇楊洪劾其徇私下御史獄武清侯石亨刑部右侍郎江淵薦鏜勇敢得釋已而爲大同副總兵與郭登不協時忿爭乞罷兵柄不許四年請盡統精兵出塞襲虜勅止鏜以奪門功封懷寧伯明年與世券五年充陝西總兵與兵部尚書馬昂出禦虜期七月二日出師先一日夜初指揮馬亮走告鏜曹欽反謀先殺鏜及昂奪其軍攻皇城鏜披衣起急草奏呼長安左門關人曰與爾奏疾造 上前告急變稽遲軍法且斬

又走右門亦如之內廷始得集兵縛吉祥鏜微服至太平侯張瑾家議討賊賊已呼噪四出劫殺文武大臣 上出密帖隙中令百戶楊能至瑾家伺鏜云何能報鏜誓殺此賊 上喜手勅鏜父子爲朕用心滅賊賊攻長安右門不得入走攻左門又不得入欽兄弟率胡兵直趨東安門發火力攻上又勅鏜賊犯關急鏜等努力殺賊俄又勅鏜昂盡統各營兵殺賊鏜子輔子軌追賊至東市大戰軌奮力入陣砍欽兩臂傷賊并力圍軌攢鎗殺軌鏜急調神砲與諸營兵夾攻欽傷遁歸家投井中

并其黨盡擒伏誅進封侯食祿千三百石與世券
成化改元盡革奪門鏜亦在革中 上曰鏜有勞
於國老且無恙可食祿奉朝請七年卒贈涑國公
謚武敏子輔乞嗣 上曰鏜伯以奪門功封然滅
曹賊功大輔可嗣侯卒子應爵嗣侯卒子瑛嗣侯
卒無子第瑁嗣

衛穎

衛穎華亭人世官濟南指揮使正統九年陞署都
指揮僉事京營練兵十四年禦虜功陞同知是年
冬出守黃花鎮戰西直門紫荆關功陞都督同知

景泰三年總兵守宣府天順元年陞左都督以奪
門功封宣成伯食祿千一百石與世券移鎮甘肅
五年破虜鎮番八年捕番賊斬獲功多召還成化
元年盡革奪門功穎亦在革中兵部言穎有軍功
得不革增祿百石四年被劾奪祿七年乞宥與祿
朝請弘治十一年卒贈侯謚壯勇子璋嗣伯卒子
鏞嗣伯嘉靖中爲京營總兵卒子守正嗣伯

陳友

陳友全椒人永樂初起騎卒從征胡功歷陞千戶
正統初通使順寧王脫歡附降再陞都指揮僉事

并其黨盡擒伏誅進封侯食祿千三百石與世券
成化改元盡革奪門鏜亦在革中 上曰鏜有勞
於國老且無恙可食祿奉朝請七年卒贈涑國公
謚武敏子輔乞嗣 上曰鏜伯以奪門功封然滅
曹賊功大輔可嗣侯卒子應爵嗣侯卒子瑛嗣侯
卒無子第瑁嗣

衛穎

衛穎華亭人世官濟南指揮使正統九年陞署都
指揮僉事京營練兵十四年禦虜功陞同知是年
冬出守黃花鎮戰西直門紫荆關功陞都督同知

景泰三年總兵守宣府天順元年陞左都督以奪
門功封宣成伯食祿千一百石與世券移鎮甘肅
五年破虜鎮番八年捕番賊斬獲功多召還成化
元年盡革奪門功穎亦在革中兵部言穎有軍功
得不革增祿百石四年被劾奪祿七年乞宥與祿
朝請弘治十一年卒贈侯謚壯勇子璋嗣伯卒子
鏞嗣伯嘉靖中爲京營總兵卒子守正嗣伯

陳友

陳友全椒人永樂初起騎卒從征胡功歷陞千戶
正統初通使順寧王脫歡附降再陞都指揮僉事

十九年克遊擊將軍捕虜寧夏功陞都督僉事十四年龍門口捕虜功進同知克左叅將南征香爐山功陞右都督鎮守湖廣天順元年捕苗賊五開銅鼓功召還封武平伯食祿千石與世券二年出鎮番斬虜功多克總兵捕虜延綏塞功封流侯加祿百石四年卒贈沔國公謚武僖子能嗣伯卒子綱嗣伯卒子勲嗣伯卒無子第熹嗣伯卒子大策嗣伯

曹義

曹義儀真人嗣父官燕山指揮永樂中出塞至半

壁山有功宣德中征梅花洞功累陞督府僉事克遼東總兵破虜開原進左都督天順元年封豐潤伯食祿千二百石與世券卒贈侯謚莊武子麟先卒麟庶子振嗣伯坐法革衣冠習禮國子監逾年復爵又坐法奪祿一年卒庶子愷嗣伯卒嘉靖中子棟乞嗣吏科駁棟義非開國靖難功不得嗣上與棟嗣伯卒庶子松乞嗣吏部言義以邊將立功封伯傳三世予奪請 上裁松得嗣伯

施聚

施聚北通州人父忠立功洪武永樂間陞金吾右

衛指揮使出塞征胡戰沒聚嗣官累有戰功正統九年以都指揮征兀良哈功最陞督府僉事叅將遼東進總兵都督 英宗北狩聚慟哭即日引兵西裨將爭進牛酒聚曰 主上安在忍受此數日抵京師天順元年以禦胡功封懷柔伯食祿千一百石明年以守邊久與世券聚智勇朴直與士卒同其苦在遼東訓練有法增繕障塞興脩儒教虜人畏服卒贈侯謚威靖子榮嗣伯卒子鑑嗣伯坐法謫貴州立功赦復伯不得任軍政卒子瓚嗣伯卒無子弟瑾嗣伯卒

焦禮

焦禮山後人父焦八思台洪武中降除薊州衛指揮僉事禮以舍人從軍有功 太祖喜禮與禮官禮辭宣德初嗣父官累立功遼東陞都督左軍充總兵守遼東景泰元年破虜小團山斬獲數千天順初封東寧伯食祿千二百石與世券禮守遼東二十餘年年八十二卒贈侯謚襄毅適孫壽嗣伯卒無子壽弟俊嗣伯卒子淇嗣伯卒子一鳳優給卒無子淇弟詢嗣伯卒無子再從姪棟嗣伯棟者詢從兄澄之子禮元孫也

劉聚

劉聚清豐人聚叔永誠太監出鎮甘肅聚驍勇有智略隨永誠塞上立功歷陞都督同知天順五年捕曹賊功陞右都督成化六年充總兵出延綏塞遇虜身被七創濺血力戰大破虜也烈忽斬首百級獲二千封寧晉伯食祿千石八年為征虜將軍總陝西諸兵捕虜榆林塞斬首四百五十獲馬畜千與世伯券是年捕虜鎮靖堡未幾虜大入塞聚設伏破虜斬首百五十奪獲人畜數萬十年卒贈侯謚威武子祿嗣伯卒無子弟福嗣伯福為京營

總兵加太子太保弘治十三年 上召輔臣平臺議諸將去留福與成山伯王鏞皆勒罷卒子岳嗣伯卒無子從子文嗣伯卒子良璽優給

毛忠

毛忠涼州人曾大父刺及洪武初歸附從軍戰沒大父拜都征哈密又戰沒父寶永樂中從出塞功授百戶老忠嗣官立功其涼歷陞都督成化三年征番忠先登手斬番賊轉戰俘獲功多封伏羌伯食祿千石總兵鎮甘肅固原土胡滿四反猖獗勅忠討之力戰先登後援不能繼中流矢沒子海孫

鎧皆沒於陣贈忠侯謚武勇與世伯券忠子佺先
卒孫銳嗣伯有祖風弘治十三年鎮兩廣再加太
子太傅正德三年逆瑾索銳金錢不能應落太子
太傅奪祿十五勒罷瑾誅銳自陳得還祿復官傳
嘉靖三年卒贈太傅謚威襄子江嗣伯

趙輔

趙輔鳳陽人曾大父端開國功累官都指揮世指
揮使父本從征漢庶人陞都指揮輔嗣官正統十
四年大臣薦陞都指揮練兵禦虜有功充叅將出
居庸守懷來禦虜天順八年陞都督同知成化元

年總兵征兩廣蠻俘斬二萬二年封武靖伯食祿
千二百石三年征建州夷斬俘千人四年進侯與
流侯券十六年輔辭流侯乞世伯與伯世券減祿
二百石二十二年卒贈容國公謚恭肅子承慶嗣
伯卒子弘澤嗣伯卒子世爵嗣伯

仇鉞

仇鉞江都人世指揮同知立功陞使充游擊將軍
寧夏驍勇敢戰正德五年寘鐠反陷賊中京師訛
言公從賊興武營守備保勛者又與賊聯姻爲外
應李文正公曰鉞必不從賊勛以賊故姻遂疑勛

不用諸與賊通者皆懼不復歸正白 上用勛爲
叅將公爲副總兵討賊命下纔數日勛疏上言臣
母及妻子俱在賊中臣義不顧家恨不飛渡黃河
食賊肉謝朝廷公亦稱病臥陰約遊兵壯士候保
勛楊英諸兵至河上從中發爲內應俄蒼頭書童
沒河潛入見公言諸兵至河上列營公嗾人謂賊
何錦宜急出守渡口防決河灌城遏東岸兵勿使
渡河錦果出留賊周昂守城公又稱病亟昂來問
公猶堅臥呻吟言旦夕且死蒼頭卒起捶殺昂斬
首公起披甲杖劔跨馬出門一呼諸遊兵壯士皆

至遂奪城門擒寘鐮克總兵寧夏封咸寧伯食祿
千石與世券仍總兵七年克平賊將軍征流賊功
進侯與世券加祿百石十六年子恩病恩子鸞嗣
侯

丘福

丘福鳳陽人以小卒事 成祖藩邸積年勞授護
衛千戶靖難兵初起與朱張二王首建議奪九門
轉戰真定夾河滄州靈璧先登有功累陞中軍都
督建文四年封淇國公食祿二千五百石與世券
當是時修功詔福第一福善高煦數勸 上立高

煦爲太子 上不許福質直無文有勇力善戰輒
輕敵深入永樂七年爲征虜大將軍總兵武城侯
王聰同安侯火真左右副總兵靖安侯王忠安平
侯李遠左右叅將並出塞擊虜 上曰本雅失理
逆天道羈信使命爾徂征自開平以北卽不見虜
時時如對敵日夜嚴斥望遇虜設奇奮擊否則審
察事機便宜進止又密授方略臨遣福出塞率千
餘人先至臚胸河南遇虜遊兵與戰敗虜遂乘勝
渡河又獲虜間我者尚書一人福顧飲虜尚書酒
問本雅失理今安在虜尚書言本雅失理聞兵來

北遁去此未遠可三十里福大喜曰當疾馳擒此
虜時諸軍未集皆曰此虜誘我不可信俟諸軍畢
集遣精騎四偵徐議進擊否且墮虜計福不從又
令虜尚書爲鄉導率衆直薄虜營與戰相持二日
每戰虜輒佯敗引我兵深入福意銳欲乘虜遠力
言虜示弱給我退則乘我進則伏我惟結營自固
晝揚旗伐鼓出奇兵與挑戰夜多燃炬鳴炮以張
軍聲勞困虜使虜莫測不二日我軍畢至併力奮
擊必大捷否亦可全師而還將軍奈何不慮此聰
亦力阻福皆不從欲遣火真使虜詐求和解虜謀

率精騎劫虜真猶豫未決福勵聲曰違命者斬卽上馬先馳麾士卒控馬者皆泣下諸將見元帥去不得已從行不數里虜伏四起奄至圍我遠聰率五百騎突虜陣斬虜數百人聰戰死遠馬蹶與福真忠皆被執沒虜中 成祖聞敗大怒諭 東宮明春朕且親征雪耻又遣使諭順寧王馬哈木丘福敗績或本雅失理得福軍旗幟衣甲詐劫攻爾慎防此虜以故福後不得嗣

李遠

李遠懷遠人父實開國功累陞蔚州衛指揮僉事

遠嗣官靖難初率所部及萬全衛兵從攻大同破滄州狗東平汶上沛沙河渡淮斷南兵餉道累功陞都指揮建文四年封安平侯食祿千石流侯世伯永樂七年出塞戰沒追封莒國公謚忠壯遠沉毅有膽力善騎射在諸將中言論侃侃自許忠義子安嗣侯洪熙元年爲交趾叅將失律宣德二年下錦衣獄奪券十年赦謫赤城備禦尋陞督府僉事征鎮番阿古脫兒只伯功進同知克總兵征松番及木麓川又失律正統七年下御史獄謫獨石立功贖罪卒子清十四年請嗣吏部言安再失律

立功病死清不得嗣天順元年詔與都指揮同知

王忠

王忠孝感人建文時以指揮守蔚州強勇自負靖難初與李遠歸欵北平戰白溝濟南滄州藁城率精騎爲奇兵多斬獲累功陞督府僉事建文四年封靖安侯食祿千石與世券永樂七年戰沒塞北無子弟禮斌姪全累請嗣吏部言券文子孫世襲無弟姪襲文不允宣德十年忠妻援武城侯姪孫王玘例授斌京衛指揮僉事奉忠祀

王聰

王聰蘄水人起燕山總旗陞百戶從靖難取漁陽遵化狗涿州轉戰南皮平滑口獲馬千五百還守保定復南宮冀南狗淮泗首獲舟渡江累陞督府僉事封武城侯食祿千五百石與世券永樂七年戰沒虜中追封漳國公謚武毅 上以李遠及聰嘗諫福故得褒卹無子姪孫玘請嗣吏部言聰券許子孫襲文姪孫不得嗣侯宣德十年特與玘京衛指揮僉事已而玘又累乞嗣侯不許

何福

何福未詳何許人國初以武功爲指揮使洪武十

四年從三將軍征雲南有功來獻捷再遷督府僉
事二十一年出塞至捕魚兒海俘獲萬計二十四
年克平羌將軍代西平侯討阿資三十一年擒永
寧酋十八加如誅木麓川亂魁刀千孟降其衆又
討平畢節都勻諸囉進征五開自是南蠻馴順建
文初班師進同知靖難兵起歷戰淮南北輒敗走
建文四年八月爲征虜前將軍總兵鎮陝西寧夏
節制甘肅河南山西諸兵永樂三年 上以福屯
田積穀多又嘗請定屯田賞罰爲經久計賜勅勞
福六年福請令大臣協守甘肅 上曰汝久總番

漢兵恐勢重致讒爲此言耳汝老將朕推誠倚任
勿復顧慮七年本雅失理殺我使臣給事中郭驥
糾阿魯台數入塞殺掠吏民已而二酋爲瓦剌所
敗走臚朐河欲收合散潰寇河西勅福防禦福言
韃靼脫脫不花王把秃王都督伯克帖木兒都指
揮哈刺火敦國公賽因帖木兒司徒撒兒桃賽罕
知院都秃阿魯把撒兒等來歸率衆駐亦集乃
上勅楊榮諭福曰脫脫不花等來歸止亦集乃恐
遲回生變爾與榮深議其略刺火敦伯克帖木兒
初與把都帖木兒同來也爾叛去故徘徊近塞欲

進未果朕開誠柔遠不計前過卽遣把都帖木兒
往亦集乃諭朕意或與俱來或令居赤集乃斟酌
權宜在榮與爾是年九月諭福早事 皇考多歷
歲年典兵督府小心謹愨朕初卽祚遂聯戚好寄
任干城撫附酋虜命楊榮卽軍中封福寧遠侯祿
千石又密諭福近日韃靼來歸者且勿給土田令
來北京扈從漸徙之南散處畜牧脫脫不花之事
可鑑也軍中事宜先發後聞無失機會八年從征
沙漠數違節度羣臣交劾 上念福舊人有才略
曲赦福已而有怨言都察院又劾上福懼自經死

追奪侯

郭義

郭義太安州人丙午歸附立功山東河南及征王
保保破雪山等寨克四川出塞征胡陞燕山護衛
副千戶靖難時取懷來進指揮僉事調濟陽衛又
立戰功真定永平陞北平都指揮僉事永樂五年
陞中軍都督十八年封安陽侯食祿一千一百石
世指揮使

王友

王友荊州人父榮燕山護衛百戶友嗣官事 成

祖靖難時屢戰有功累陞都指揮僉事永樂二年
丘福等言友前鋒摧敵功比劉才封清遠伯食祿
千五百石六年征交趾功進爵侯與世券七年出
塞築殺胡城飲馬河上與劉才並率衆轉餉車至
擒胡山餉車不至士卒餓死 上大怒奪其兵付
張輔八年從出塞坐縱虜失律罪死繫錦衣獄十
三年以病釋出獄卒明年子順乞嗣不許令從安
遠侯征胡自効二十二年陞羽林前衛正千戶立
功陞指揮僉事卒宣德三年子通病庶子鑑優給
候通有子還通子官十年鑑又乞嗣侯不許正統

六年乞嗣 上曰友罪坐斬不得嗣侯與指揮
僉事景泰三年又乞嗣不許天順元年詔與都指
揮使

陳賢

陳賢壽州人立功開國時爲指揮僉事從靖難九
門雄鄭真定東平功累陞督府僉事永樂二年
文皇以靖難時武臣賞未酬功者下丘福等議福
等言賢及都指揮同知張興陳志王友皆以前鋒
摧敵功與廣恩伯劉才等封賢榮昌伯食祿千石
與世券十三年卒子智先以靖難功爲指揮使府

軍後衛至是嗣伯出鎮交趾敗績奪爵隸王通爲先鋒官立功贖罪正統元年調永寧四年會赦爲指揮使宣府左衛景泰元年卒子鑑先卒鑑子勇爲指揮使天順元年詔恩得都指揮同知二年卒子雄爲指揮使功陞都指揮同知乞嗣伯不許

房勝

房勝未詳始所自起建文時爲通州衛指揮靖難兵起勝首率衆降附通州近北平 文皇得通州兵遂東出薊州襲大寧戰鄭村壩無復腋脇之憂甚喜勝累功陞都指揮使建文四年封富昌伯食

祿千石世指揮使

陳旭

陳旭全椒人父彬開國功爲指揮僉事旭以父征傷從靖難戰真定山東渡淮歷功累陞都督僉事建文四年封雲陽伯食祿千石與世券永樂七年征交趾八年卒軍中無子景泰六年旭義孫銘納券

劉才

劉才字子才霍丘人故元元帥國初率衆歸附授百戶歷營州中護衛指揮僉事從靖難有功建文

四年封廣恩伯食祿九百石永樂中修山海關又從征沙漠至懷來卒才悃幅無華恭介自守 仁宗在東宮喜才世指揮使

房寬

房寬未詳何許人洪武四年以濟南左衛指揮帥兵五千人從魏國公北平練兵繕城爲北平行都司都指揮靖難兵至大寧守將朱鑑力戰寬忽引軍降鑑力不支死之建文二年寬戰白溝河敗再戰有功已而轉戰濟沛江淮皆有功歷陞督府僉事四年封思恩侯食祿八百石世指揮使

張武

張武瀏陽人豁達有勇力稍涉書史爲燕山護衛百戶戰真定破耿炳文兵於滹沱河設伏戰勝夾河要敵西水寨累功陞都督同知建文四年封成陽侯食祿千五百石與世券當時武功第三前二人丘福朱能封公武侯第一卒 成祖出內廐馬賻武贈潞國公謚忠毅無子婿臧子聚義兒張旺匿誥券天順二年奪入官

徐理

徐理西平人甲午從軍累戰功歷陞永清衛指揮

僉事從靖難敗都督劉貞兵於寬河再陞北平都
指揮僉事又戰平都督兵於白溝河斬先鋒哨騎
追奪至雄轉戰濟南滄德間至夾河戰敗盛將軍
兵西援水西寨陞督府僉事小河敗何都督兵克
泗揚入金川門皆有功建文四年封武康伯食祿
千石與世券永樂六年卒子禎嗣伯正統九年卒
子勇嗣伯卒無子成化九年勇義兄嫂趙言勇從
姪文英家西平吏部言勇歿且二十年文英不得
嗣伯

孟善

孟善海豐人立功洪武初爲定遠百戶十九年從
征雲南又後征金山捕納哈出歷陞燕山護衛正
千戶出塞敗虜哈刺鹵獲多又以驍勇著名時召
宿衛藩邸靖難初攻九門執薛叅議破松亭關進
僉事指揮戰真定破齊尚書兵陞北平都指揮僉
事白溝濟南常山戰勝進同知夾河藁城敗盛庸
兵進使保定收官軍萬三千人陞督府僉事進同
知建文四年封保定侯食祿千二百石與世券卒
贈滕國公謚忠勇子瑛嗣侯洪熙元年瑛弟賢連
坐奪爵毀券謫雲南安安置宣德十年赦與京衛指

揮使卒子俊嗣官天順元年詔與嗣伯爵卒四年子昂乞嗣伯吏部以詔無世襲文執不許內批昂嗣伯卒子達成化八年乞伯優給不允十一年又乞嗣下吏部議仍與指揮使京衛弘治元年又乞嗣伯不許

唐雲

唐雲未詳何許人事 成祖藩邸最久慎恪果毅侍衛左右出入未嘗離雲於諸將中年最高且勇智爲人所信服軍中一日有異意雲察知之諭以天命衆遂定 上由是益信任之每出師必命雲

輔世子守城敵至出兵禦之未嘗失利累陞都指揮使建文四年封新昌伯食祿一千石世指揮使

茹瑄

茹瑄衡山人洪武初年十六貢入太學擢承勅郎陞左通政歷通政使副都御史試兵部尚書二十六年加太子少保爲真 上嘗稱瑄蔡瑄楊靖秦達復其家事建文君改吏部尚書與太常卿黃子澄不相能刑部尚書暴昭發瑄贓罪未入吏部出領河南布政司事未幾召還復尚書兵部曩武官襲替隸兵部五府不得預至是令瑄會掌中前後

府事駙馬都尉謝達耿璿尹清署左府事孝陵指
揮使黃鉉右府都督僉事陳春並請旨選授靖難
兵至江上遣瑞及景隆都督王佐見 成祖請割
地講和瑞等見 成祖伏地頓首惶恐流汗浹背
稱萬死不敢仰視 成祖勞瑞等又頓首不能發
一言 成祖曰公等有言卽言無甚恐久之又頓
首言建文君願割地講和 成祖笑曰公等說客
耶始吾無罪削爲庶人輒云大義滅親吾今救死
不暇何以地爲况 皇考封建諸子各有分地但
縛奸臣來吾解甲謝罪謁孝陵歸藩瑞等唯唯頓

首退 成祖入京召問瑞瑞頓首首勸進建文四
年詔言景隆瑞佐及陳瑄忠孝 太祖扶持社稷
默相事機其功甚重封瑞忠誠伯食祿一千石終
其身仍兵部尚書特見信用密預諮議慎厚不洩
永樂七年請告歸道出長沙不謁谷王谷王以爲
言時方重藩王禮都察院遂劾瑞違 祖訓谷王
又嘗開金川門有功 成祖重違王意不得已下
瑞錦衣獄頌繫竟卒獄中子鑑秦府儀賓銓鏞及
家口二十七人皆沒官謫戍廣西河池 仁宗釋
還 宣宗與所沒田廬瑞狀貌魁竒雍容凝重謙

和有容不妄言笑事必依於寬厚事 太祖十餘年小心無過 太祖嘗稱瑞賢人君子

王佐

王佐不知始所自起歷官都督同知靖難兵至金川門建文君遣曹國公茹尚書及佐見 文皇龍潭議割地講和不聽三人者遂望風納款且獻密謀比至城金川門遂開建文四年封順昌伯食祿千石與世券

王寧

王寧壽州人尚懷慶公主爲駙馬都尉公主 太

祖第六女母成穆孫貴妃建文中寧通語言 成祖洩中禁事籍其家繫寧錦衣獄建文四年詔封功臣稱寧孝子 太祖忠于國家正直無私不阿權勢遂遭誣陷幾致殞身達孝推恩免宜褒答封永春侯食祿一千石與世券永樂元年又官其子貞亮羽林前衛指揮僉事寧嘗侍 上言及 太祖時事 上愴然寧即勸 上誦經飯僧爲 皇考福利 上不悅五年寧坐事下詔獄已而釋之卒貞亮先卒宣德七年貞亮子彝乞嗣衛僉事不允再乞亦不允十年彝又援詔言公主適孫請嗣

侯 英宗授彛衛僉事帶俸奉公主祀

袁容

袁容壽州人父洪開國功官至都督容初選燕府儀賓配永安郡主靖難時城守從征皆有功 成祖即位進郡主爲公主容駙馬都尉食祿千石永樂元年再論功封廣平侯食祿一千五百石與世券凡大駕出入皆命容居守公主卒 昭皇停容侯祿與駙馬祿一千石 宣宗即位與侯祿容端謹謙和通敏有才智卒贈沂國公謚忠穆子禎宣德四年嗣侯孝友廉慎卒無子庶弟瑄正統元年

乞嗣 上曰容封以公主恩禎嗣以公主子瑄庶子可長陵衛指揮僉事帶俸奉公主容祀天順元年詔與瑄侯卒弟琇成化十五年嗣官長陵衛卒姪輅二十二年冬乞嗣侯內批允輅言官駁議上曰詔書許子孫嗣輅容孫也輅後停嗣仍世衛僉事卒子夢弘治三年乞嗣侯不許

李讓

李讓舒城人父申留守左衛指揮同知讓燕邸儀賓靖難兵起率府兵執謝貴等取大寧戰白溝河有功署掌北平布政司事佐 昭皇居守防禦有

功建文君聞之大怒欲誘致讓且宥申讓不肯顧其家力戰破平安兵九門建文君遂殺申沒其產并殺諸男子族居人沒其幼子婦女異姓姻屬盡謫戍邊讓聞之慟哭誓死戰益力永樂元年進駙馬都尉封富陽侯食祿千石掌北京刑部事卒贈景國公謚恭敏子茂芳八年嗣侯二十二年坐事上曰茂芳早失父不知禮停祿革冠服讀書國子監十年能改過復爵祿否且削奪爲編氓是年奪券卒子輿正統二年授長陵衛指揮僉事天順元年詔與伯爵卒子欽成化十五年乞嗣伯吏部言

輿伯出詔恩詔無世伯文欽嗣官長陵衛

火真

火真韃靼人名火里火真居開平紫乾嶺洪武初歸附爲燕山護衛千戶靖難時取大寧克真定戰白溝河馳馬突陣手斬數十人長興侯兵敗走真領騎兵每出輒有斬獲呼噪歸營敵皆憚其悍勇歷官督府僉事建文四年封同安侯食祿千五百石與世券永樂八年戰沒虜中

金忠

金忠本名也先土干元太保不花孫虜中呼爲王

子永樂二十一年冬 上出塞駐王莊堡也先土
千率妻子種落千人來歸 上喜立封忠勇王賜
姓名金忠詔諭天下與鐵券金印玉帶綺衣金幣
鞍馬牢廩居第器用歲祿千石并官其部酋時時
侍從 仁宗卽位加太子太保支二俸諭蹇義曰
朕嗣位文武大臣進官忠得無冀恩澤亦以慰其
心爾義對曰胡人降附者衆皆視朝廷待忠何如
聖慮及此柔遠之道也宣德三年扈巡邊出喜峰
口至會州請深入捕虜自効或言忠非我族類去
必不返 上曰朕推心待人何疑於忠同此覆載

任渠去留竟與兵數千遣去數日忠俘斬首虜及
畜產歸 上大喜曰忠朕之金日殫也拊其背飲
之酒明年進太保忠勇悍好謀恭慎不伐感 三
聖恩遇矢心竭力至死不懈

金玉

金玉未詳始所自起永樂七年以督府僉事從出
塞至長秀川護輜重十八年封惠安流伯食祿八
百石世指揮使

薛斌

薛斌昌平人父薛台元洪武二十一年歸附賜薛

姓陞燕山右護衛指揮僉事斌嗣官從靖難累功
歷陞都督僉事北征功陞同知永樂十八年封永
順流伯食祿九百石世指揮使十九年卒子壽童
年五歲二十二年叔安順伯引見 仁宗西角門
諭蹇義立命壽童嗣伯賜名綬正統十四年歿于
土木贈侯謚武毅子輔乞嗣吏部言斌券世指揮
使綬嗣伯本特恩執不與景泰元年内批輔嗣伯
成化十二年卒子勲乞嗣吏部執如初内批勲嗣
伯後如券與官正德六年卒子璽乞嗣伯吏部又
執如初與璽指揮使

薛貴

薛貴昌平人舊名脫火赤兄歡爲燕山護衛指揮
貴以舍人有膽力從靖難脫 文皇於險累功陞
都指揮使再從征胡功陞督府僉事封安順伯食
祿九百石洪熙元年與世伯宣德元年進侯加祿
三百石與世券卒贈濱國公謚忠勇

李賢

李賢韃靼人名丑驢故元兵部尚書洪武中歸附
賜姓名李賢譯虜書燕府侍 仁宗東宮最恭慎
擢紀善靖難有功陞都指揮僉事 仁宗卽位進

右都督年八十請老封忠勤伯食祿千一百石賢
嘗薦種人七十通蒙古書勝國舊臣 成祖命教
譯書以爲鴻臚寺丞又有把敦杭者海山人降附
賜姓名吳守義從北征累功至督府僉事卒贈西
和伯謚僖順

吳管者

吳管者本胡種從父允誠降父封恭順伯管者屢
從征有功出塞斬虜降附部落歷功陞都督洪熙
元年封廣義伯食祿千石與世券宣德元年管者
妻早奴來朝貢馬曹賊反廣義伯琮與兄恭順侯

瑾椎長安門上變告琮不知誰子或曰管者子或
曰孫也

滕定

滕定山後人父瓚住元樞密知院洪武二十二年
來降授會州衛指揮僉事二十六年賜姓滕靖難
功歷陞燕山右衛指揮使建文三年卒兄安嗣官
明年陞大寧都指揮同知永樂四年卒定嗣官改
金吾左衛八年出塞征胡有功陞都指揮使洪熙
元年陞督府僉事出塞征胡累有功宣德四年封
奉化伯食祿八百石與世券五年與武進伯朱冕

充左右叅將從鎮朔大將軍薛祿巡邊還與豐城侯李賢修永寧隆慶城正統五年卒子福乞嗣吏部言券無世嗣文不許福得爲指揮使

金順

金順瓦剌人名阿魯哥失里永樂七年來降授大寧都指揮僉事八年從北征至威胡鎮追敗本雅失理靜虜鎮又敗阿魯台進同知洪熙元年陞僉事督府宣德三年又從巡北邊有擒虜功明年上以順遠歸効勞勤事 皇祖封順義伯食祿八百石卒子忠纔五歲優給候長與指揮僉事

李英

李英父南哥西垂人洪武初率衆降授西寧州同知累功陞西寧衛指揮僉事英嗣官事 成祖征胡出塞有功宣德四年以擒寇清邊通使封會寧伯食祿八百石鎮守西寧七年史昭陳通構讒下詔獄 上特詔諭英父子赦其罪削爵封伯纔二年英健武有威名旣沒妻夏氏愬英功 英宗憐之官其子昶錦衣指揮同知天順元年詔錄功臣後進都指揮使累官至督府子孫世錦衣使

蔣信

蔣信故降胡也名把台從舅氏忠勇王來降歷戰塞北有功陞都督與全俸正統中封忠勇伯食祿千石土木敗降也先也先令信居其弟賽罕王部下景泰初信舊部曲達官伯顏答里從皮兒馬黑麻來請和告于謙曰把台欲南歸久矣不得間每南望揮涕感國恩慙死無地謙因奏言信從虜肆惡 皇上曲全其家信或未知况因諜用間取勝之術宜令伯顏答里密諭信家人無恚令其設策破虜入寇之計或擒殺也先來歸卽授王爵事露以疑虜心卽成亦足彌亂 上從謙言信從 上

皇至大同大同諸將吏不肯出喜寧嗾虜殺袁彬得信告 上皇獲免信竟從 上皇歸時已停信祿至是補給卒贈侯謚僖順

羅秉忠

羅秉忠父困卽來沙河衛指揮永樂中討平肅州叛回哈喇馬牙陞都督同知二年秉忠征阿台朶兒功陞千戶累功陞指揮使十年調平山衛十四年征辰沅擒苗酋韋同烈功陞都督同知天順初陞都督成化三年克游擊征貴州有功四年封順義流伯食祿千石十六年卒謚榮壯子珍不得嗣

伯

和勇

和勇祖阿魯台降 文皇封和寧王父阿卜只奄
授左都督勇以父故爲錦衣指揮使正統十四年
紫荆關斬首虜功歷陞都督僉事天順元年進同
知五年充遊擊將軍征廣蠻成化元年又征廣蠻
功歷陞左都督加祿歲百石已而潯州獲叛酋斬
首功多封靖安流伯食祿千一百石十年卒謚武
敏子忠自歷戰功爲錦衣指揮僉事乞嗣伯不許
得爲指揮使錦衣

李玉

李玉交河人靖難初自大寧歸附立功陞都督宣
德四年封新建伯歲祿八百石賜券世指揮使歷
官四十年典領宿衛小心敬畏質約自居

蔣廷珪

蔣廷珪未詳始所自起衛聖夫人楊氏夫也洪熙
元年封保昌伯卒謚莊靖

趙安

趙安狄道人從兄琦土指揮同知坐罪死安謫戍
甘州永樂元年進馬除臨洮百戶使西域從北征

歷功陞指揮同知宣德二年陞都指揮同知充叅將征松壘番散刺有功陞督府僉事五年充叅將從史昭討曲先十年援甘涼鎮番有功正統元年進同知充副總兵守甘肅出塞降虜捕斬有功封會川流伯食祿千石九年卒子英爲指揮使立功陞督府同知卒子鉉嗣官乞嗣伯不許

任禮

任禮臨漳人起燕山護卒從靖難歷戰懷來白溝河東昌藁城順德入金川門有功陞都指揮同知永樂庚寅甲午壬寅癸卯四從出塞征本雅失理

阿魯台有功陞督府僉事洪熙元年進同知宣德元年從征漢庶人有功陞都督正統元年總兵備甘肅二年轉戰石城兒泉斬捕首虜中律封寧遠流伯食祿千二百石十二年鎮守甘肅降沙州都督喃哥等十三年與世伯景泰中守備南京成化元年卒贈侯謚僖武子壽嗣伯鎮守陝西征滿四失律論死宥戍邊卒子弘乞嗣吏部言壽總兵失律脫死幸謫戍弘不得嗣伯與指揮使京衛弘治中屢乞嗣伯不許

沈清

沈清滁人世官燕山百戶靖難時累功陞指揮同知出塞征胡陞督府僉事洪熙元年充叅將守居庸關宣德初劾下御史獄從征漢庶人扈駕出大寧再進都督正統元年與太監阮安工部尚書吳中修建京師九門城樓六年以營建宮殿功封修武伯食祿千一百石逾年卒謚襄榮八年子榮嗣伯沒於土木削爵景泰三年詔恩子煜得嗣伯減祿三百天順初贈榮侯謚僖愍成化十三年煜淫於酒色奪爵十八年卒子祺嗣伯卒無子弟坊嗣伯卒子瑞幼月與贍米弘治十四年吏部言修武

伯初封非軍功下廷議瑞得世指揮使瑞乞比昌寧伯趙勝孫鑑得銓錦衣衛

譚廣

譚廣丹徒人開國功爲燕山百戶從靖難起兵首縛中朝人陳榮等三十人名奸細榮等皆沉湮不可考矣戰敗齊尚書兵又戰白溝真定夾河功陞指揮使又戰敗都督韓觀兵陞大寧都指揮再從出塞征胡至九龍口先鋒破賊陞都督鎮守宣府正統元年以泉州知府蔡錫爲山東副使叅理廣軍機文書六年捕虜獲胡馬中律封永寧流伯食

祿千石九年卒廣在鎮二十年勤儉忠勇威行胡虜恩結人心明年子亨得爲指揮使屢乞嗣伯吏部言非世券不許

陳懷

陳懷合肥人父甄開國功爲真定副千戶懷嗣官陞通州千戶正靖難從戰雄鄭滄德小河泗州渡江功歷陞都指揮僉事遼東永樂六年白堂海口功陞使從出塞功陞都督同知未幾總兵勦松番斬捕功多陞都督正統九年總兵出古北口至虎頭山捕斬首功封平鄉流伯食祿千一百石十四

年歿土木贈侯謚忠毅子黼乞嗣吏部言懷非世券內批懷父子三人陣沒與黼嗣伯景泰五年卒子政乞嗣吏部執如初移兵部兵部爲請內批懷累朝有功與政嗣伯政用兵兩廣久之自言兩廣功多乞世伯吏部執如初內批政自陳邊功與子信嗣伯弘治六年卒子俊乞嗣伯吏部執如初會兵部議上與俊指揮使屢乞嗣伯不許

馬亮

馬亮淇人燕山騎卒從靖難奪九門戰密雲大寧白溝河西水寨渡江功歷陞都指揮僉事永樂中

四從征胡出塞宣德初從征漢庶人又從出塞至會州歷陞左都督正統九年流沙河斬虜獲輜畜功封招遠流伯食祿千一百石十一年卒謚榮毅子麟爲指揮使屢乞嗣伯吏部言非世券不許

楊能

楊能六合人世開平指揮使己巳之變拔爲將驍雄善戰有功陞督府同知景泰初總兵鎮宣府與李秉共事天順元年陞都督仍充總兵鎮宣府援大同有功封武強流伯食祿千石四年卒無子父林乞以能弟倫嗣伯吏部言武強本流伯倫得世

指揮使

石亨

石彪 曹欽

石亨渭南人方面豐軀美髯及膝從姪彪體貌亦雄偉髯亦過臍亨嘗與彪貰酒相工遇之酒肆大竒之曰今當平世奈何二人有封侯相亨家本軍官伯父巖無子亨嗣爲寬河衛指揮僉事亨不學然識字英果壯毅善騎射有膽略提大刀輪舞如飛每從征挺刃當先輒立竒功累陞都指揮使彪亦驍勇能挽強弓善揮斧始以官舍從亨有功授大同衛鎮撫正統十二年亨遷都督僉事爲大同

左叅將守萬全路彪亦陞至指揮使從亨叅謀十四年八月王師敗績亨與總兵官楊洪等並械繫錦衣衛獄十月虜酋也先犯京城有言亨勇者景帝出亨獄令立功贖罪亨統兵出安定門即與虜遇挺刃單馬進左右馳突獨殺數十人彪又持斧率親兵從之諸軍懽呼踴躍聲震天地虜却而西亨等追戰城西虜復却而南亨令彪率精兵千人誘虜南至彰義門虜見彪軍少逼之亨率衆乘之蹂虜大潰南奔亨日夜追虜三日至清風店北虜將出紫荆倒馬關懼我躡後亨遣謀者給虜亨

且未至陣中將者假亨名耳虜信之來攻亨率彪與精銳數十騎奮擊大呼直貫虜陣刀斧齊下殺虜數百人虜始知亨在囂亂相蹂踐亨悉衆乘之大捷虜所掠羊馬財物盡棄餌我兵虜得遁去亨旣敗虜威名益震虜自是不敢復踰塞深入輒請和虜見邊人呼石亨爺爺論功亨第一封武清伯尋進封侯兼太子太師總京營彪陞都督僉事爲大同左叅將諸子姪澗溟濬仁並陞千戶鎮撫澗戰沒彪爲叅將虜畏之稱石王于少保請勅亨巡邊至大同召還爲團營總兵于少保忠義清直不

避強禦 景帝倚任之亨恃功驕橫于少保又時
時裁抑亨亨畏于少保不敢動然積恨之天順元
年正月 景帝不豫亨與都督張軌都御史徐有
貞內官曹吉祥蔣冕等定謀奉 上皇復辟爲飛
語謂于少保及王文矯取金牌勅符迎襄世子矣
又曰 上令內官張永等捕亨數人掌兵者矣庚
辰遂因吉祥矯稱得 皇太后懿旨曰天子疾大
漸殆弗與天位久虛 上皇居南內春秋鼎盛于
今八年聖德無虧天意有在人心所屬傾以奸臣
擅謀闕而不聞欲迎立藩王以承大統將不利於

國家亨等其率兵以迎 上皇是月壬午四更亨
與軌吉祥等暨羣從子弟家兵叩南內宮門請
上皇升輿從東華門入奉天殿即位侍衛都督范
廣禦戰死闕下亨遂言于少保有反謀不欲立
皇上請殺于少保 上意未決亨有貞力言不殺
謙今日事無名 上不得已殺謙及文陳循商輅
尚書江淵俞士悅等戍邊歸田廢 景泰皇帝爲
郟王亨以奪門功第一進封忠國公歲祿三千石
與世券有貞封武功伯入內閣彪封定遠伯爲大
同副總兵諸從弟子姪及諸義婿子孫皆以奪門

功得官錦衣都指揮指揮者三十二人千戶鎮撫者二十一人其諸竄名奪門冒官者四千餘人亨矜功恃寵日與吉祥出入禁廷在上左右弄權進退文武大臣盡革邊鎮撫奪民間婦女田廬財物無算彪亦益驕橫凌鎮守文武大臣御史楊瑄等聯章劾亨亨疑有貞李賢等嗾言官見上泣訴強上下賢有貞并都御史御史耿九疇瑄等于獄會天大變異得釋賢留有貞九疇竟逐去諸御史謫戍調除有差及賢再入閣亨亦有力賢竟不悅亨亨益干朝政乞請無忌上亦厭亨左右

怒亨者伺隙數言亨短上漸疑亨一日上登

翔鳳樓見亨新第極偉麗顧問恭順侯吳瑾撫寧伯朱永曰此何人居永謝不知瑾曰此必王府

上笑曰非也瑾頓首曰非王府誰敢僭如此上

不應顧內臣裴當曰汝聞若言乎亨橫睚眦中傷人莫敢告亨者上又諭賢曰總兵官豈可無故

輒入內廷令左順門閤者非宣召不得輒入總兵又以軍官貪暴復設巡撫亨慚憤必欲上復革

巡撫上不許會兵部尚書陳汝言奸賊得罪

上歎息思好箇于謙亨益不自安又知衆不容已

薦處士吳與弼 上又諭賢左右干預奈何賢請
上獨斷 上嘗與賢論及奪門功賢曰迎駕可奪
門不可又曰郕王不諱天命人心咸屬陛下何必
奪門且內府門豈可奪奪字尤非順不可示後世
賴天靈佑助事幸成脫郕王左右先知亨輩不足
惜不審置陛下何地 上愕然又曰臣彼時極知
此舉之非亦有邀臣與謀者臣不從臣愚謂郕王
果不起率文武羣臣請陛下復位安用如此勞攘
誰功陞賞誰復敢招權納賂者 上曰善由是益
薄亨亨生子男未彌月 上見亨喜令亨負兒見

朕 上見兒又喜摩其頂曰虎兒也往善撫之朕
行與卿結姻 上意寵欲亨子駙馬且探亨意亨
不喻輒對不敢不敢臣兒無福 上笑而頷之命
左右取金鎖繫兒項賜封鎖定侯亨頓首謝負出
上益疑亨彪在大同肆貪暴誣劾都御史年富逮
至京 上疑問賢賢乞遣官即訊果不實彪又數
侮其總兵總兵因彪嘗奏城威寧海子遂為流言
誣彪有異志 上固疑彪欲召彪還大同人又乞
彪為總兵 上遂大怒或又曰彪結死黨必欲留
據大同為亨外援 上亦疑出亨意尋進彪侯召

還京侍衛亨覺 上疑令人促彪疾馳入京彪既至會北虜入貢見彪於朝羅拜稱石王 上聞益疑不可解天順四年二月 上密詔御史按劾即日縛彪棄市籍其家亨逮繫錦衣獄死亨既死法司請瘞亨尸 上念亨功欲從之問賢賢請盡法斬首 上不肯竟瘞亨都御史寇深等素惡亨論彪大逆收亨家籍其財產亨從孫進士後亦被收死獨亨從姪錦衣都指揮使溟得戍彬州少子溍鎖定侯者幼未收溟在彬累功陞指揮溍至正德末尚游食京師亨縣人孫弘初以舉人歷肥鄉洛

陽令歷陞太僕寺丞少卿以迎駕功陞工部右侍郎亨再薦弘爲尚書 上陞吏部左侍郎曰再陞當爲尚書亨曰即尚書何不可何再陞耐煩邪亨既敗弘亦罷爲大理通判亨粗豪直爽軒豁無機巧嘗薦馬昂爲兵部尚書又力薦賢有貞入內閣已逐有貞留賢賢大恨亨亨權日重軋賢賢日見上親信亨威名震主不知謙損竟及於難五年七月朔吉祥及其姪昭武伯欽反言亨功與我同亨死我安得不反吉祥欽並伏誅吉祥不知其始所以進負奪門功與國政欽以故封昭武伯暨兄弟

子姪皆冒武官吉祥不通文墨恐事歸司禮監稍附內閣有貞賢籠絡行已意至薦文武臣僚輒受金錢引用非人內閣或相左不能盡如吉祥意遂積不平會御史楊瑄劾吉祥亨罪狀 上善瑄等言吉祥在旁初甚慚懼已見 上寬不問即請罪瑄等 上未許亨謂吉祥曰今在內惟公在外惟我彼陷我二人者意叵測吉祥初亦惡亨不相下每訐其短至是遂相結合訴 上內閣專權與言官應和 上不得已下有貞等獄又逐岳正積威市恩漸有異志吉祥嘗率番將往雲南福建殺賊

冒功因收爲牙爪奪門時竄姓名陞大官爲將校亨敗盡革諸冒功者吉祥又曲庇諸番將 上積聞吉祥凶橫稍裁抑踈吉祥益憤逆謀益決會兵部尚書馬昂懷寧伯孫鏜出師西征欽約兄都督鐸從兄都督鏞弟都指揮鉉早朝殺昂等奪其兵入內爲亂推其黨黠爲謀主吉祥誘禁兵爲內援故所結番將都督伯顏也先等數十人各以番兵從是日夜漏二鼓恭順伯及都指揮完者禿亮詣長安門告變 上令疊石塞諸禁門召中官急縛吉祥四鼓賊兵合番漢五百騎直抵禁城殺錦衣

指揮逯杲擊賢傷首并執吏部王尚書東朝邱鐸帥數騎西殺左都御史寇深斫傷廣寧侯劉安欽縱火焚東西皇城門適大雨火滅比明詔會昌侯孫繼宗統諸兵討賊鏜先登力戰諸將分道逆擊昂以精兵殿欽退屯東安門鏞以衆接戰自辰至午敗鏞斬之欽中流矢創甚還駐東大市街相拒至酉鉉以百餘騎往來馳突我師環結不動自相枕籍鏜斬先潰者狗師督戰益急追斬鉉欽懼令百餘騎還攻朝陽門出奔不克諸軍進薄大破其衆鐸爲亂兵所殺欽匿其家咎井中伯顏也先等

縋城遁遣兵追之皆獲是晚 上御午門朝百官下吉祥伯顏也先等御史獄伏誅仍棄鐸市磔欽屍籍其家賞將士餘黨並落職流嶺南明日下詔暴欽罪

楊善

楊善大興人學增廣生靖難時守城功爲引禮舍人歷官鴻臚卿陞禮部侍郎掌鴻臚事扈 英宗北征還改副都御史虜至守城功陞右都御史仍掌鴻臚時通政司叅議王復陞禮部侍郎中書舍人趙榮陞鴻臚卿往使虜不答已而禮部侍郎李

實大理少卿羅綺指揮馬欽再使實反覆辯析虜
悔禍許送 上皇還京景泰元年七月善及侍郎
趙榮使竟奉迎 上皇歸陞左都御史天順元年
奪門功封興濟伯食祿千二百石與世券卒贈侯
謚忠敏子宗二年嗣伯成化元年奪奪門功官爵
宗寄祿錦衣爲指揮同知宗累乞嗣伯不允徐有
貞亦以奪門功封武功伯入內閣

張輓

張軌

張輓忠武王第三子以功臣子累戰功爲中軍右
都督奪門功封文安伯食祿千二百石與世券石

亨諱盡奪奪門封輓以勲戚故得不奪天順六年
卒贈侯謚忠僖子斌嗣伯坐詛呪論死宥閑住斌
子羽乞恩得指揮使寄祿錦衣衛奪券軌以勲戚
入宿衛永樂末稍有軍功陞錦衣衛指揮僉事洪
熙元年進同知宣德元年從征漢庶人正統元年
征虜有功陞指揮使又陞都指揮僉事十一年驟
陞督府僉事充副總兵征貴州景泰元年陞右都
督與石亨曹吉祥厚善天順元年以奪門功封太
平侯食祿二千石卒贈裕國公謚勇襄子瑾二年
嗣侯成化元年革奪門功與瑾指揮使寄祿錦衣

衛奪世券瑾卒子淳弘治五年乞嗣侯不允

董興

董興未詳何許人其封海寧伯亦未詳功所自起天順元年封二年爲遼東總兵與曹吉祥家爲姻戚交結在遼東不能禦虜顧益科刻卒伍又比昵都指揮夏霖上下爲奸利巡撫程信屢裁抑興伍年曹賊反誅興坐流廣西成化元年停伯不得嗣

李文

李文不知何許人未詳其所自起爲陝西都指揮督練西寧土兵封高陽伯天順四年秋虜孛來大

舉入寇自大同威遠西擁衆南侵文按兵不動虜遂直抵鴈門代朔忻掠人畜無算烽火達於京師郊甸大驚棄家走入京城莫能止急遣顏彪馮宗出兵駐紫荆倒馬二關虜退復至移二軍鴈門文竟不能截虜後文本流伯

趙勝

趙勝遷安人宣德中世官景泰元年累功陞都指揮僉事天順五年討曹賊功陞督府同知已而充叅將出固原捕虜有功成化四年陞都督充總兵官鎮遼東七年捕斬朵顏有功召還十二年修京

城加太子太保三千營總兵十九年封昌寧流伯
食祿千石又明年加太保卒贈侯謚壯敏子先卒
弘治元年孫鑑乞嗣伯吏部言昌寧初封流伯鑑
嗣世指揮使銓錦衣

李震

李震南陽人父謙督府僉事震嗣指揮使正統中
征兀良哈木麓川香爐山螃蟹寨功歷陞督府僉
事天順四年充總兵官征武岡黎平賊五年進攻
兩廣貴州蠻陞同知成化元年還兵湖廣征荆襄
賊功歷陞左都督十一年清水江斬捕功多封興

寧流伯食祿千石十四年革爵閑住震鎮湖廣時
與叅將吳經有隙經弟綬從汪直刺事欲甘心震
適有道人以黃白術得罪即附會震嘗匿道人私
習讖諱且有反謀遣人籍逮之途遇直震呼冤言
一介武夫蒙恩僭爵父子富貴已極更欲何爲此
仇家經所爲直不聽下震錦衣獄鞫問無驗得不
死二十年復伯爵乞誥券不許子昂不得嗣

神英

神英京師人高祖保立功洪武時爲大同指揮僉
事父傑雲南功進指揮使陞陝西都指揮天順初

英嗣指揮使延安衛驍勇敢戰先登累有斬虜功
成化弘治間充總兵官守寧夏延綏宣府大同歷
四鎮累官署都督正德五年給事中歐豸劾英年
老不任金革致仕是年賂瑾金寶萬計矯旨英居
官五十餘年有戰功欲封英爵下兵部議尚書曹
元阿瑾卽稱英功傳會盡錄上英前後首功中律
瑾又欲箝衆口下廷臣再議莫敢異同是年四月
封英涇陽伯食祿八百石與世券數月瑾敗言官
交章劾英奪爵繳誥券爲右都督時有張富保定
新城人少力耕自給弟永太監正德時與劉瑾導

上非幾得倖用事大臣請誅八黨者有永名永初
與瑾好相結左右富得爲錦衣指揮使已而瑾勢
盛益橫永不能堪正德五年安化王寘鐫反寧夏
永督軍與楊一清西討兵未至仇鉞等已擒諸反
者班師還京入見 上發瑾罪狀誅瑾遂論功封
富秦安伯永弟容安定伯並食祿千石與世券時
容已爲錦衣都指揮僉事矣嘉靖初詔盡革正德
間傳陞乞陞冒陞者官爵永出奉康陵富容並革
爵奪券與容都督富錦衣指揮使已而霍韜又論
容賄一清坐罪減級安化之役未嘗一接戰佞幸

封者六人武德未詳始所以進爲義兒冒國姓封永壽伯太監谷大用兄大寬高平伯馬永成兄山平涼伯魏彬第英鎮安伯並食祿千石與世券大用第大亮又以平流賊功冒封永清伯五人者皆已官錦衣指揮封一詔盡勒罷奪券英獨以彬在得爲都督同知又有江彬蔚州衛指揮使驍勇狡險狠忍不可測正德七年從宣府總兵官張俊征流賊山東善戰頗有功班師入京賂錢寧引入豹房得見 上彬機警善迎人意 上喜留侍左右時出奸謀蠱惑陞左都督冒國姓爲義兒時時在

上前講說兵事因請盡調遼東宣府大同延綏四鎮精兵入京雜引入大內操練號外四家又罔

上振耀國威創西官廳爲提督十一年益樹奸黨

乘 上喜時妄言萬全都指揮李琮陝西都指揮神周勇略得召入豹房侍 上琮周亦冒國姓爲

義兒十二年誘 上至宣府大起宮殿號家裏迷

留朝廷明年始回鑾封彬平虜伯琮周皆都督彬子勲錦衣都指揮是年導 上又出宣府至大同

至偏頭關至榆林至山西索金壁裘馬數十萬矯令邊官各獻虎豹犬馬逼金錢又萬萬計縛辱官

吏縱放死囚強奪民婦女無忌憚十四年又導
上幸山東至太山下江淮百官伏闕諫矯旨杖殺
員外郎陸震等餘編氓士伍削籍謫降朝士忠梗
者驅逐一空是年彬子杰勲然錦衣都指揮會寧
庶人反彬欲盡斂江南財導上親征百官不敢
諫率諸寇徒官校四出南抵蘇杭西至武昌劫脅
吏民金錢萬萬計至邳州縛知州高巖詔獄幾死
至南京專事蒙蔽題奏一百三十六封皆虜報獄
詞大事一切廢閣不上十五年宸濠縛至南京百
官跪行宮請上回鑾矯旨叱辱大臣梁儲王憲

百官班退彬知權重勢逼恐禍至謀不軌盡斂南
京諸城門鎖鑰中府經歷楊美璜執不與彬誣美
璜賍縛下刑部獄八月十五日誘上遊牛首山
三宿不返禁衛兵夜無故大呼噪起彬懼不敢逞
尋奉駕還至通州逆謀益急盡召諸文武大臣至
通州惶懼不敢發比上入京竟不豫臥豹房崩
大學士楊廷和計擒彬并琮周伏誅籍其家時又
有許太者起指揮驍勇通文義爲遊擊將軍征流
賊河南山東淮沛間有功陞都督冒國姓爲義兒
從上巡邊矯斬虜功封安邊伯太頗知法度不

敢挾威福肆毒以故得不誅謫戍邊

張昶

張昶永城人父麟洪武二十年以女爲燕世子妃授兵馬副指揮食俸京師二十八年從世子還北平三十二年冬昶從 文皇靖難戰永平大寧有功至鄭村壩遇齊尚書兵大戰先登陞義勇中衛指揮同知建文四年與內臣琰東援薊州還又從梁銘戰沈都司兵白河上陷陣斬首有功陞都指揮永樂中調金吾再調錦衣旗手二十二年妃正位中宮陞昶左都督洪熙元年封彭城伯食祿千

五百石與世券贈麟彭城侯謚恭靖 宣宗奉

母后謁二陵昶兄弟從 太后特召見行宮諭令

謹飭保家祚 宣宗厚母家禮昶兄弟正統三年

卒子輔病廢孫瑾嗣伯成化十六年卒子信嗣伯

正德三年卒子欽嗣伯嘉靖八年釐恩澤侯惟彭

城惠安以軍功半得世嗣如故十六年卒明年子

勳嗣伯昶家本謹厚又 孝誠昭皇后有功德

仁宗在東宮非 孝誠禍且不測宣德正統間天

下治平皆 昭皇后力也以故其恩澤兩封至今

傳世

張昇

張昇昶弟靖難時以舍人守北平有功陞義勇中衛正千戶永樂三年陞指揮僉事十二年從上出塞至忽刺忽失溫遇虜有戰功稍進官二十二年冬陞都督同知明年陞左都督正統五年秋封惠安伯食祿千一百石與世券六年卒子軾爲典寶先卒孫琮嗣伯成化三年卒無子弟瑛嗣伯無子庶兄瓚嗣伯弘治六年卒子偉嗣伯正德中爲總兵征流賊失律下獄論死會赦得釋嘉靖初復爲京營總兵十四年卒贈侯太傅謚靖襄子鏞嗣

伯二十二年坐郭勛姻黨下詔獄未減得出

孫忠

孫忠字子敬鄒平人初名愚貢入太學歷介休永

城主簿率人供役天壽山陞鴻臚序班宣德初以

女配 宣宗賜名忠陞督府僉事又明年封會昌

伯食祿千石與世券忠長厚好施年八十五卒贈

侯謚康靖五子長繼宗次紹宗顯宗續宗皆都指

揮純宗錦衣僉事孫十人皆錦衣千戶顯宗稍驕

橫忠不喜景泰三年繼宗嗣伯 英宗復辟進繼

宗侯加祿二百石與世券逾年贈忠安國公改謚

恭憲已而革奪門功繼宗家子弟蒼頭冒功得官者二十餘人疏謝罪辭免 英宗念繼宗母家革諸蒼頭官官諸子弟如故五年總兵討曹賊加太保弟顯宗蒼頭坐法繼宗爲請 上不悅繼宗頓首以母九十老爲辭 上終不允一日諭輔臣曰祖宗來外戚不得預政今繼宗得典兵 太后顧不樂初爲內庭寺人言防閑須戚里惑其言至今猶悔李賢對曰孫侯醇謹無他腸後更不可爲例耳成化元年又革奪門官傳旨繼宗出特恩如故卒贈郊國公謚榮襄子璉錦衣指揮使先卒十六

年璉子鎮嗣侯避先帝諱改名銘正德十五年卒明年子杲嗣侯嘉靖初坐營八年以安昌伯故盡革外戚恩澤封十六年杲卒子應乾不得嗣

吳安

吳安丹徒人父彥名有女入宮洪熙初召彥名子忠爲錦衣百戶宣德三年卒安以忠弟嗣官正統十四年十二月陞忠府軍前衛指揮使是月 景帝尊生母爲 皇太后詔天下 太后即彥名女也太監興安傳旨改安錦衣衛景泰四年陞左都督前府安弟信陞南京前軍都督七年太監王誠

傳旨封安安平伯食祿千石天順元年 太后復
爲貴妃安削爵

錢承宗

錢承宗海州人五世祖整從靖難克懷來大寧鄭
村壩功陞燕山右護衛副千戶老子通嗣官白溝
河滄州淝河功陞指揮使老子貴嗣官從 文皇
北征宣德十年陞都指揮僉事正統七年 睿皇
后恩陞中軍都督同知卒子欽嗣錦衣帶俸指揮
使正統十四年欽與弟鍾北征沒於土木欽無子
鍾子雄天順元年陞都指揮使成化二年累陞後

府都督同知成化十五年卒承宗幼陞都指揮使
錦衣帶俸優給弘治二年比王源乞恩封安昌伯
食祿千石與世券嘉靖四年卒謚榮僖明年子維
圻嗣伯是年卒第維垣乞嗣伯吏部請與維垣錦
衣帶俸指揮使如欽官 今皇帝制曰可已而維
垣又乞嗣伯制曰外戚無功坐享重職非古帝王
報功之典朕甚不取廷臣屢建議愛國重名器也
下會九卿言官議議上 今皇帝曰戚里濫膺重
爵名器旣輕人不知勸維垣停伯不得嗣著爲令

周壽

周壽昌平人父能 孝肅太后父也 太后初入宮侍 英宗爲貴嬪冊爲貴妃生 太子天順元年授錦衣正千戶卒子壽嗣官八年陞左府都督僉事 憲宗卽位尊貴妃爲 皇太后陞壽督府同知成化三年封慶雲伯食祿千石與世券贈能慶雲侯十七年進壽侯加祿二百石是年加贈能寧國公謚榮靖弘治元年加壽大保祿一百石正德二年卒贈宣國公謚恭和又明年子瑛嗣侯壽第歲初以恩授錦衣正千戶成化三年陞指揮使十七年傳陞都督同知二十一年封長寧伯食祿

千石與世券弘治元年加祿百石正德二年卒明年子瑋嗣伯十四年卒子大經嗣

王源

王源上元人父鎮 孝貞皇后父也天順六年爲中府都督同知成化二十年源以嗣都督封瑞安伯食祿千石與世券弘治元年增祿五年進侯又增祿與世券加贈鎮阜國公謚康穆十年源弟清以都督同知封崇善伯食祿千石與世券十六年加源太保又明年加大傅又增祿正德二年源弟濬以左都督封安仁伯食祿如清是年濬卒子桓

嗣伯十三年又增源祿嘉靖三年卒贈太師謚榮靖子橋嗣伯

張巒

張巒興濟人 孝康皇后父也成化中 皇后爲東宮妃授巒鴻臚卿弘治三年陞督府同知是年冬封壽寧伯食祿千石與世券五年立 東宮巒得進侯加祿二百石是秋卒贈太保昌國公謚莊肅巒本儒家從兄岐舉進士爲按察副使以戚恩召入臺爲僉都御史言官交劾岐岐亦有吏才巒子鶴齡是年嗣侯十六年秋太監李榮傳旨加大

保增歲祿正德中進太傅嘉靖二年三月加太師又加祿三百石是秋以定策功進封昌國公鶴齡弟延齡弘治八年以都督同知封建昌伯食祿千石與世券十六年進侯加太保祿六百石嘉靖初加太傅祿一百石嘉靖八年盡革外戚封不得世嗣二張亦在革中未幾小張坐法并大張逮獄幾滅族矣自古外戚貴盛莫如西漢慘禍亦莫如西漢如衛青以奴產子數年父子四封侯又二十四年子孫遂無噍類然竊漢龜鼎者竟外戚也我朝孝慈馬后有賢德兵亂外家無存者父馬公追封

徐王歲時祀 仁孝徐后中山王長女本功臣家
無封爵其餘官止都督至稱舅氏有封爵外戚封
不俟繼世寔始於秦陵秦陵時二張甚橫時時入
禁中內臣何文鼎素忠直二張窺御帷文鼎持
大瓜箠之幾死秦陵亦不罪文鼎當是時二張奪
民田廬請官寺舍又豪奴姻親凌官府篡獄囚莫
敢詰金玉積如山不厭市津龍斷徃徃皆二張人
揚州府同知葉元嘗辱張僉人元至京羣僉入吏
部撲元尚書馬文昇護元得免言官時論劾朝廷
亦不問近世外戚莫橫於二張至正德時稍稍輯

斂乃嘉靖以來益戢戢自謹大張雖以定策功封
公然亦不敢視邵蔣務謙退自保尚書胡世寧上
言宜保全外戚不宜使後世謂外戚封公自陛下
始顧二張內倚 昭聖外多瑕釁嗜利之人奔走
其門生長短朝廷頗疑二張奸徒劉東山遂奏二
張有逆謀朝廷遂決意考問薄昭故事旨會法司
多官議衆亦恐傷 太后意又其事無踪跡且皆
先朝事奏從未減 上不喜延齡坐斬鶴齡與南
京錦衣指揮閑住延齡又有詞刑書聶賢等稍爲
開釋 上怒停書俸一年司官下詔獄錦衣都指

揮王佐力爲推鞠反坐東山等重罪下法司唐龍
王廷相屠僑等言東山情罪深重竟荷校死鶴齡
子宗說延齡子宗儉調南京盡沒賜產延齡繫御
史獄嘉靖二十五年死於西市

邵喜

邵喜昌化人寓杭州父林 孝惠太后父也太后
初入宮爲貴妃生 獻皇帝及岐雍二王喜歷陞
錦衣指揮使嘉靖初尊貴妃爲 皇太后封喜昌
化伯食祿千石與世券明年卒謚榮和子蕙嗣伯
五年卒無子族人爭嗣 今皇帝下吏部議又令

郭勛張璠方獻夫胡世寧李承勛議世寧言 皇
上必欲邵氏嗣封蓋推 皇考獻皇帝之所自出
于 孝惠皇太后又推 皇太后之所自出于其
父母邵林楊氏而欲榮富其子孫也不幸林子孫
皆絕今爭襲者乃其旁枝非林子孫其不當嗣明
矣臣恐賜彼一代之爵而或亂彼百代之宗誤我
皇上明倫之智達孝之仁可不慎乎臣觀江南蘇
松諸郡浙江諸省未見有侯伯世嗣者喜封伯未
逾年遂卒傳其子蕙僅再世而遂絕輔陞指揮弟
弼卽天玘三子長次二人皆以疾廢其不幸門祚

之薄如此蓋亦地氣使然故臣愚以爲與之嗣伯則宜考覈倫序若濫及旁枝誤及異姓彼第曰弟彼姪曰姪 太后兄弟不得以之爲子父母不得以之爲孫他人富貴而本親告絕幽明之間各生嫌隙生者不得安其養死者不得歆其祀况門祚薄而福蔭隆恐非邵氏之利莫若停其封爵量與恩澤蔭卑流遠乃久長之福七年春 上特令杰嗣伯八年革外戚封停嗣

蔣輪

蔣輪其先徐州人尺籍隸京師父敷以 獻皇后

家授兵馬指揮從之安陸老無子以輪爲後嘉靖元年輪以錦衣指揮僉事封玉田伯食祿千石與世券羣從山錦衣指揮同知壽僉事太正千戶四年輪卒贈太保謚榮僖明年子榮初爲奉祀顯陵嗣伯榮弟華爲奉祀今爲都督守顯陵

夏儒

夏儒上元人 毅皇后父也始以錦衣指揮使陞都督同知正德二年封慶陽伯食祿千石與世券十年卒子臣十六年嗣伯嘉靖二年加太子太保卒八年停嗣

陳萬言

陳萬言元城人 孝潔皇后父也初爲諸生頗解
科舉文字嘉靖元年立 中宮以萬言爲鴻臚卿
陞都督同知二年封太和伯食祿千石與世券官
其子紹祖尚寶司丞八年盡革外戚封十四年萬
言卒太和伯不得嗣萬言孫書乞恩得錦衣都指
揮同知帶俸

崔元

崔元代州人尚 憲宗女永康公主爲駙馬都尉
嘉靖初以奉迎車駕封京山侯食祿千五百石與

世券已而坐張皇親事下詔獄得釋元好交文士
流聲譽 上喜元寵信得與內閣大臣及郭勛朱
希忠並召見燕語元得乘間發勛奸惡勛坐死元
弟兄嘉靖二年進士官至按察副使元卒其子不
肖盡破其家死

方銳

方銳江寧人 孝烈皇后父也嘉靖九年十一月
皇后選入掖庭克九嬪明年二月陞銳錦衣署鎮
撫八月 上諭兵部朕慎選淑女爲嬪御用廣嗣
續九嬪之父授署職似於人情有未盡銳可與錦

衣正千戶十三年正月 皇后正位中宮 上諭
兵部陞銳衛都指揮使十八年二月隨幸承天至
衛輝陞銳後府左都督十九年正月封安平伯食
祿一千石二十一年二月勅吏兵二部朕恭奉
皇妣慈孝獻皇后几筵痛憶遺音周足三期贊成
朕孝后妃列御宜加恩遇銳進封侯二十五年二
月卒五月子承裕嗣伯三十三年十一月加太子
太保

陶仲文

陶仲文湖廣黃岡人初以吏員爲遼東海州衛大

使嘉靖十七年九年滿陞正九品守選會 上求

方士有薦仲文者得召入見一歲屢遷至神霄保

國宣教高士未幾進神霄保國弘烈宣教振法通

真忠孝秉一真人領道教事總各宮觀住持知道

錄事食正二品俸尋加少保禮部尚書又加少傳

餘若故食正一品俸俄進少師少傅兼少保禮部

尚書神霄云知道錄事若故我朝開國靖難勲

戚內閣五楊吏宰三王皆未有兼總三孤者仲文

獨以真人躋宗伯領三孤云尋又改神霄紫府闡

範保國弘烈云知道錄事少師少傅兼少保禮

部尚書

部尚書若故勳階特進光祿大夫柱國又兼支大
學士俸尋進支伯俸二十九年四月召吏部尚書
夏邦謨至迎和門授勅禮部尚書兼真人陶仲文
禱雨濟旱力贊平獄特封爲恭誠伯賜誥歲祿一
千二百石八月內降歲加祿米一百石仲文疏辭
上曰卿祝釐保國禱祈雨暘累累効職若鞫獄非
卿職也果專恭太上盡誠玄修雖數爵亦未克酬
今以平獄謝似非宜且准辭

皇明異姓諸侯傳下

終

子履準校

孫心材重校



